

AKASHVANI (AIR)
RNU : KOLKATA
Bengali Text Bulletin

Date 24-01-2025

Time: 7-35 A.M.

বিশেষ বিশেষ খবর -

১) রাজ্য সরকারের বিভিন্ন প্রকল্প ও পরিষেবার সুবিধা মানুষের কাছে পৌঁছে দিতে নবম দুয়ারে সরকার কর্মসূচি আজ শুরু হচ্ছে। চলবে পয়লা ফেব্রুয়ারি পর্যন্ত।

২) পরপর আবাসন হেলে পড়ার ঘটনার মধ্যেই বাগুইআটি এবং দক্ষিণ নারায়ণপুরে গতকাল ফের আবাসন হেলে পড়ায় বাসিন্দাদের মধ্যে তীব্র আতঙ্ক ছড়িয়েছে।

৩) উত্তর দিনাজপুরের গোয়ালপোখরের পাঞ্জি পাড়ায় আদালত থেকে বিচারাধীন বন্দিকে নিয়ে যাওয়ার সময় পুলিশকে লক্ষ্য করে গুলি চালানায় আরও এক দুষ্কৃতি ধরা পড়েছে।

মালদার কালিয়াচকে গতকাল পুলিশকে লক্ষ্য করে চলেছে গুলি। গ্রেফতার দুই।

৪) পশ্চিমী ঝঞ্ঝার কারণে রাজ্যে তাপমাত্রা উর্ধ্বমুখী।

৫) আই এস এল ফুটবলে যুব ভারতী ক্রীড়াঙ্গণে ইস্টবেঙ্গল আজ কেরালা ব্লাস্টার্স-এর মুখোমুখি হচ্ছে।

৬) বাংলা মহিলাদের অনূর্ধ্ব-১৯ একদিনের ক্রিকেটের ফাইনালে পৌঁছেছে।

০০০০০০০০০০০০০০০০০০০০

রাজ্য সরকারের বিভিন্ন প্রকল্প ও পরিষেবার সুবিধা মানুষের কাছে পৌঁছে দিতে নবম দুয়ারে সরকার কর্মসূচী আজ শুরু হচ্ছে। চলবে পয়লা ফেব্রুয়ারি পর্যন্ত। সকাল ১০টা থেকে শুরু হয়ে বিকাল ৪টে পর্যন্ত কাজ চলবে। বিভিন্ন এলাকায় শিবির করে মোট ৩৭ টি প্রকল্পের সুবিধার জন্য আবেদন জমা নেওয়া হবে। লক্ষ্মীর ভান্ডার, কন্যাশ্রী, বার্ধক্য ভাতার মতো চিরাচরিত প্রকল্পের পাশাপাশি এবার কৃষি যন্ত্রাংশ কেনার আর্থিক সাহায্য প্রকল্পেও আবেদন করার সুযোগ মিলবে। আগে যেসব এলাকা বেশি গুরুত্ব পায়নি, সেখানে শিবিরের সংখ্যা বাড়ানোর নির্দেশ দেওয়া হয়েছে। যাঁদের আবেদন গ্রাহ্য হবে না, তাঁদের বাতিল হওয়ার কারণ এবং কী করণীয়, তা ঠিক মতো বুঝিয়ে দিতে হবে। শিবিরে জমা পড়া আবেদনগুলি ২৮ শে ফেব্রুয়ারির মধ্যেই সব খতিয়ে দেখতে হবে। আবেদন সংক্রান্ত কাজের জন্য কেউ টাকা চাইলে তা বরদাস্ত করা হবে না বলেও রাজ্য সরকারের তরফে জানানো হয়েছে।

০০০০০০০০০০০০০০০০০০০০

রাজ্য সরকার হাওড়ার সাঁকরাইলে একটি রাবার পার্ক গড়ে তুলবে। প্রকল্পটি রূপায়ণ হলে দেড় হাজার কোটি টাকার লগ্নির পাশাপাশি ১০ হাজার কর্ম সংস্থান হবে বলে রাজ্যের শিল্প ও বাণিজ্য মন্ত্রী শশী পাঁজা জানিয়েছেন। কলকাতায় এক অনুষ্ঠানে তিনি বলেন, কেন্দ্রীয় বাণিজ্য মন্ত্রক, পশ্চিমবঙ্গ শিল্প উন্নয়ন নিগম ও রাজ্য সরকারের মিলিত উদ্যোগে পিপিপি মডেলে পার্কটি গড়ে উঠছে। সেখানকার ১৭১ টি প্লটের মধ্যে ইতোমধ্যেই ১৩০ টি বন্টন করা হয়েছে। রাবার শিল্পে রাজ্যকে উল্লেখযোগ্য স্থান হিসাবে গড়ে তুলতে এই পার্ক অন্যতম ভূমিকা নেবে বলে মত প্রকাশ করেন তিনি।

০০০০০০০০০০০০০০০০০০০০

রাজ্যে একের পর এক বাড়ি হেলে পড়ার ঘটনায় সাধারণ মানুষের মধ্যে আতঙ্ক ছড়িয়েছে। ট্যাংরা, বাঘাঘতীন, আগরপাড়ার পর বাগুইআটির জগৎপুরে দুটি আবাসন

হেলে পড়েছে। বিধাননগর পৌর নগরের ২৩ নম্বর ওয়ার্ডের নেতাজী পল্লীতে একটি বিল্ডিং পাশের বিল্ডিং-এর ওপর বেশ খানিকটা হেলে গেলে সেটিও সামনের দিকে হেলে পড়ে। স্থানীয় বাসিন্দাদের অভিযোগ, পুকুর বুজিয়ে কয়েক ছটা জমির ওপর আবাসনগুলি গড়ে তোলা হচ্ছে। এরফলেই এই বিপত্তি। স্থানীয় কাউন্সিলর বিষ্ণু মন্ডল বিষয়টি নিয়ে বিধাননগর পৌরনিগমে লিখিত অভিযোগ জানিয়েছেন।

এদিকে, তিন নম্বর ওয়ার্ডের দক্ষিণ নারায়ণপুর অঞ্চলেও একটি আবাসন হেলে পড়ে। খবর পেতেই সেখানকার বাসিন্দাদের নিরাপদ আশ্রয় সরিয়ে নিয়ে যাওয়া হয়েছে। জানা গেছে, গোটা আবাসনটাই অবৈধভাবে নির্মাণ করা হয়েছিল।

কষ্টার্জিত অর্থে কেনা ফ্ল্যাট এভাবে হেলে পড়তে দেখে দিশেহারা বাসিন্দারা।

অন্যদিকে, গোটা বিষয়টি নিয়ে শুরু হয়েছে রাজনৈতিক চাপানোতর।

বাড়ি হেলে পড়ার ঘটনায় রাজ্য সরকারকে কটাক্ষ করেছেন বিরোধী দলনেতা শুভেন্দু অধিকারী।

(বাইট - শুভেন্দু)

এর পাঁচটা হিসেবে তৃণমূল কংগ্রেসের রাজ্য সম্পাদক কুণাল ঘোষ বলেন-

(বাইট - কুণাল)

০০০০০০০০০০০০০০০০০০

মেদিনীপুর মেডিকেল কলেজে নিম্নমানের স্যালাইন ব্যবহারের ফলে প্রসূতির মৃত্যুতে স্বাস্থ্যমন্ত্রী ও স্বাস্থ্য সচিবের পদত্যাগের দাবিতে বিজেপি আজ কলকাতায় একটি মিছিল করবে। বিরোধী দলনেতা শুভেন্দু অধিকারী এতে অংশ নেবেন। দুপুর

দুটোয় কলেজ স্কোয়ার থেকে মহম্মদ আলি পার্ক পর্যন্ত এই মিছিলে বিজেপি-র বিভিন্নস্তরের নেতৃত্ব উপস্থিত থাকবেন।

০০০০০০০০০০০০০০০০০০০

নিয়োগ দুর্নীতি মামলায় জেলবন্দি প্রাক্তন মন্ত্রী পার্থ চট্টোপাধ্যায়কে গতকাল এস এস কে এম হাসপাতালের কার্ডিওলজি বিভাগের আই সি ইউ-তে ভর্তি করা হয়েছে। হাসপাতালের বিভিন্ন বিভাগের চিকিৎসকদের নিয়ে একটি মেডিকেল বোর্ড গঠন করা হয়েছে। সূত্রের খবর শ্বাসকষ্টজনিত সমস্যা বাড়ায় সোমবার তাকে হাসপাতালের জরুরী বিভাগে ভর্তি করা হয়।

০০০০০০০০০০০০০০০০০০০

আগামীকাল ২৫-শে জানুয়ারী জাতীয় ভোটার দিবস। এই উপলক্ষ্যে রাজ্যস্তরের মূল অনুষ্ঠানটি হবে কলকাতার ভাষা ভবন অডিটোরিয়ামে। রাজ্যের মুখ্য নির্বাচনী আধিকারিকের পরিচালনায় ওই অনুষ্ঠানে প্রধান অতিথি হিসেবে উপস্থিত থাকবেন রাজ্যের মুখ্য সচিব মনোজ পন্থ। ভোটারদের মধ্যে সচেতনতা বৃদ্ধির লক্ষ্যে ইতিমধ্যেই রাজ্যস্তরে বিতর্ক, অঙ্গন, প্রবন্ধ রচনা এবং শ্লোগান তৈরি এই চারটি বিভাগে প্রতিযোগিতার আয়োজন করা হয়েছে। আগামীকাল ভাষা ভবনে বিজয়ীদের পুরস্কৃত করা হবে বলে রাজ্যের মুখ্য নির্বাচনী আধিকারিকদের দফতর সূত্রের খবর।

০০০০০০০০০০০০০০০০০০০

দিল্লিতে সাধারণতন্ত্র দিবসের কুচকাওয়াজে এবার পশ্চিমবঙ্গের ট্যাবলো অংশ নিচ্ছে। রাজ্য সরকারের লোক প্রসার প্রকল্পকে সামনে রেখে এবং নারী ক্ষমতায়নে লক্ষীর ভাঙার প্রকল্পের ভূমিকাকে তুলে ধরে ওই ট্যাবলো পরিকল্পনা করা হয়েছে। জঙ্গলমহলের প্রেক্ষাপট ও টেরাকোটা মন্দিরের আদলে ট্যাবলোটিকে সাজিয়ে তোলা হয়েছে। ছৌ এবং বাউল শিল্পীরা পরিবেশন করবেন রাজ্যের তরফে সাংস্কৃতিক অনুষ্ঠানে রাজ্যের এই বিষয় ভাবনা ইতোমধ্যেই কেন্দ্রীয় সরকারের প্রতিরক্ষা মন্ত্রকের সংশ্লিষ্ট নির্বাচক কমিটির ছাড়পত্র পেয়েছে বলে নবান্নে প্রশাসনিক সূত্রে জানা গেছে।

উল্লেখ্য, গতবার, কন্যাশ্রী প্রকল্পের ওপর রাজ্য সরকারের প্রস্তাবিত ট্যাবলো কেন্দ্র বাতিল করে দিয়েছিল। বাংলার ঐতিহ্যপূর্ণ লোকশিল্পের পুনরুজ্জীবনের লক্ষ্যে শিল্পীদের স্বীকৃতি এবং আর্থিক সহায়তা দিতে রাজ্য সরকার বিশেষ প্রকল্প হাতে নিয়েছে। এখনও পর্যন্ত ১ লক্ষ ৮১ হাজার শিল্পী এই লোকপ্রসার প্রকল্পের অধীনে এসেছেন।

এদিকে, দিল্লির সাধারণতন্ত্র দিবসে এবারের কুচকাওয়াজে ডাক পেয়েছেন নদীয়ার আড়ংঘাটার বস্তাগ্রামের বাসিন্দা সঞ্জয় বিশ্বাস। নারকেল মালায় অনন্য শিল্পকর্ম ফুটিয়ে তুলে স্বীকৃতি পেয়েছেন তিনি। এই আমন্ত্রণে তিনি গর্বিত এবং আগামী দিনে আরও উন্নতমানের কাজ করতে চান বলে সঞ্জয় জানিয়েছেন।

০০০০০০০০০০০০০০০০০০

উত্তর দিনাজপুরের গোয়ালপোখরের পাঞ্জি পাড়ায় আদালত থেকে বিচারাধীন বন্দিকে নিয়ে যাওয়ার সময় পুলিশকে লক্ষ্য করে গুলি চালানোর ঘটনায় আরও এক দুষ্কৃতি ধরা পড়েছে। হইবুর রহমান নামে ওই ব্যক্তিকে গতকাল ডালখোলা থানার পাতনোর এলাকা থেকে পুলিশ গ্রেফতার করে। সে এলাকায় কুখ্যাত দুষ্কৃতি হিসেবে পরিচিত।

০০০০০০০০০০০০০০০০০০

এদিকে, মালদার কালিয়াচকে পুলিশকে লক্ষ্য করে গুলি চালানোর ঘটনায় দুজনকে গ্রেফতার করা হয়েছে। জানা গেছে বেআইনি কাফসিরাপ উদ্ধার করতে গেলে বরুন মন্ডল ও মিঠুন শেখ নামে ঐ দুই অভিযুক্ত পুলিশকে লক্ষ্য করে গুলি চালায়। তবে কোন পুলিশকর্মী আহত হয়নি বলে খবর। ধৃতদের কাছ থেকে উদ্ধার হয়েছে ১০০ বোতল ফেনসিডিল কাফসিরাপ, একটি সেভেন এমএম পিস্তল, দুটি কার্তুজ, একটি ম্যাগাজিন। আজ তাদের আদালতে তোলা হবে।

০০০০০০০০০০০০০০০০০০

কল সেন্টার খুলে আন্তর্জাতিক প্রতারণা চক্রের হৃদিশ পেতে এনফোর্সমেন্ট নির্দেশালয় ইডি, রাজ্যের ১০টি জায়গায় হানা দিয়েছে। ED-র দাবি, সল্টলেক সেক্টর ফাইভে বসে বিভিন্ন দেশের নাগরিকদের সফটওয়্যার পরিষেবা দেওয়ার নাম করে প্রতারণা করা হয়েছে। বাঙ্গুর এলাকাতেও খোলা হয়েছিল কল সেন্টার। কোটি কোটি টাকা হাতিয়ে ক্রিপ্টো কারেন্সির মাধ্যমে তা পাচার করা হতো বলে জানা গেছে। এপর্যন্ত ২৫ থেকে ৩০ কোটি টাকা প্রতারণা করা হয়েছে বলে জানা গেছে। কেন্দ্রীয় বাহিনীকে সঙ্গে নিয়ে ইডির দল গতকাল কলকাতা, হাওড়া-সহ ১০ জায়গায় তল্লাশি অভিযান চালায়। ইডির-দল যায় বালিগঞ্জ, তোপসিয়া, পিকনিক গার্ডেন, সল্টলেক সেক্টর ফাইভ-এও। প্রতারণা চক্রের সঙ্গে কলকাতার এক ব্যবসায়ী রাজেশ গোয়েঙ্কার নাম উঠে এসেছে। তার ঠিকানাতেও চলে ইডির তল্লাশি।

০০০০০০০০০০০০০০০০০০

হাওড়ার উদয়নারায়ণপুর থেকে এক বাংলাদেশীকে গ্রেফতার করেছে পুলিশ। শেখ শুভ নামে ওই ব্যক্তির বাড়ি বাংলাদেশে বলে জানা গেছে। উলুবেড়িয়ার বাজার পাড়ায় ওই ব্যক্তি বাড়ি ভাড়া নিয়ে থাকতো। তার কাছ থেকে ভারতীয় পরিচয়পত্র বাজেয়াপ্ত হয়েছে। গতকাল শেখ শুভকে উলুবেড়িয়া আদালতে তোলা হলে ৭ দিনের পুলিশ হেফাজত হয়েছে।

০০০০০০০০০০০০০০০০০০

দক্ষিণ ২৪ পরগনার বাসন্তীতে অঙ্গনওয়াড়ি কেন্দ্রে রান্না ঘরের চাল ভেঙে দুই শিশু সহ তিনজন গুরুতর আহত হয়েছেন। বাসন্তীর চার নম্বর গরানবোস গ্রামে গতকালের ঘটনা। রান্নার কাজ চলাকালীন এই দুর্ঘটনা ঘটে। অঙ্গনওয়াড়ি কেন্দ্রটির বেহাল অবস্থার কথা প্রশাসনকে জানিয়ে কোন লাভ হয়নি বলে স্থানীয়দের অভিযোগ। আহতদের হাসপাতালে ভর্তি করা হয়েছে।

০০০০০০০০০০০০০০০০০০

দক্ষিণ কলকাতার হরিদেবপুর থানা এলাকার ডায়মন্ড পার্কে একটি দোতলা বাড়ির একতলার ঘর থেকে এক মহিলার দেহ উদ্ধারের ঘটনায় চাঞ্চল্য ছড়িয়েছে। তার গলায় ক্ষত ছিল বলে পুলিশ সূত্রে খবর। দেহটি ময়না তদন্তের জন্য পাঠানো হয়েছে। মৃত্যুর পরিচয় জানার চেষ্টা চলছে।

০০০০০০০০০০০০০০০০

আইটিসি ইনফোটেক কলকাতায় আর্টিফিশিয়াল ইন্টেলিজেন্স (এআই) বা কৃত্রিম বুদ্ধিমত্তা বিষয়ক গ্লোবাল হাব গড়ে তুলতে চলেছে। আসন্ন বিশ্ববঙ্গ বাণিজ্য সম্মেলনে সংস্থার এই সিদ্ধান্তের কথা আনুষ্ঠানিক ভাবে ঘোষণা করা হবে বলে জানা গিয়েছে। সংস্থার গ্রিন সেন্টার ক্যাম্পাসে গ্লোবাল এআই হাব গড়ে তোলা হবে। বিশ্বের বিভিন্ন প্রান্তের গ্রাহকদের পরিষেবা দেওয়ার কাজ করবে এই হাব। কর্মসংস্থান হবে কয়েক হাজার যুবক-যুবতীর। তিন থেকে চার বছরের মধ্যে এই হাব পুরোপুরি কাজ শুরু করে দেবে।

০০০০০০০০০০০০০০০০

পশ্চিম ঝঞ্ঝার কারণে চলতি সপ্তাহে রাজ্যে জাঁকিয়ে শীত পড়ার সম্ভাবনা নেই। সর্বনিম্ন তাপমাত্রা ২ থেকে ৩ ডিগ্রি সেলসিয়াস বাড়তে পারে বলে জানিয়েছে আবহাওয়া দপ্তর। একইসঙ্গে ঘন কুয়াশা থাকবে রাজ্য জুড়ে। আগামী সপ্তাহের শুরুতে উত্তরের কয়েকটি জেলায় হালকা বৃষ্টির সম্ভাবনাও রয়েছে। হালকা বৃষ্টি কিংবা তুষারপাত হতে পারে দার্জিলিং এবং কালিম্পাঙে। তবে দক্ষিণবঙ্গে কোথাও আপাতত বৃষ্টির সম্ভাবনা নেই।

আজ সকালে কলকাতায় সর্বনিম্ন তাপমাত্রা রেকর্ড করা হয়েছে ১৮ দশমিক ২ ডিগ্রী সেলসিয়াস যা স্বাভাবিকের থেকে ৪ ডিগ্রি বেশি। সর্বোচ্চ তাপমাত্রা ২৭ ডিগ্রীর আশেপাশে থাকার সম্ভাবনা।

oooooooooooooooooooo

সল্টলেকের যুবভারতী ক্রীড়াঙ্গণে আগামীকাল আইএসএল ফুটবলের ম্যাচে ইস্টবেঙ্গল, কেরালা ব্লাস্টার্স এর বিরুদ্ধে খেলবে। খেলা শুরু হবে সন্ধ্যা সাড়ে সাতটায়। ইস্টবেঙ্গল ১৬ ম্যাচে ১৪ পয়েন্ট নিয়ে লিগতালিকার একাদশ স্থানে রয়েছে। কেরালা ১৭ ম্যাচে ২১ পয়েন্ট নিয়ে অষ্টম স্থানে রয়েছে

oooooooooooooooooooo

বাংলা মহিলাদের অনূর্ধ্ব-১৯ একদিনের ক্রিকেটের ফাইনালে পৌঁছেছে। গতকাল সেমিফাইনালে তারা ৯ উইকেটে হায়দ্রাবাদকে পরাজিত করে। প্রথম ব্যাট করে হায়দ্রাবাদ ৮৫ রান করে। বাংলা ১ উইকেট হারিয়ে প্রয়োজনীয় রান তুলে নেয়।

oooooooooooooooooooo

নদীয়ার কল্যাণীতে চারদিনের রঞ্জি ট্রফির ম্যাচের দ্বিতীয় দিনে বাংলা তাদের প্রথম ইনিংসে ১ উইকেটে ১০ রান হাতে নিয়ে দিনের খেলা শুরু করবে। গতকাল হরিয়ানা প্রথম ইনিংসে ১৫৭ রান করেছে। টসে জিতে বাংলা, হরিয়ানাকে প্রথমে ব্যাট করতে পাঠায়। বাংলার সুরজ সিঙ্ঘু জয়শোয়াল ছয়টি উইকেট নিয়েছেন।

এদিকে, অম্বর রায়ের পর বাংলার দ্বিতীয় সর্বকনিষ্ঠ ক্রিকেটার হিসাবে অঙ্কিত চ্যাটার্জীর প্রথম শ্রেণীর ক্রিকেটে অভিষেক হয়েছে। গতকাল ১৫ বছর ৩৬১ দিন বয়সে রঞ্জিতে তার অভিষেক হয়। ঋদ্ধিমান সাহা অঙ্কিতের হাতে বাংলার টুপি তুলে দেন।

oooooooooooooooooooo

oooooooooooooooooooo